

Hadiah RM70,000.00 menanti pemancing di UPM

SERDANG: Hadiah bernilai hampir RM70,000.00 menanti peserta pertandingan memancing Menerjah Legenda Kolam UPM di Kolam Bukit Ekspo, Universiti Putra Malaysia (UPM), Ahad ini.

Pertandingan anjuran bersama Wakjali Event Management dan Yayasan Generasi Malaysia itu menawarkan hadiah wang tunai RM40,000.00 untuk juara, kedua RM10,000.00 dan ketiga RM5,000.00. Ibu Pejabat Polis Daerah Sepang turut memberi kerjasama dalam menjayakan acara ini, khususnya dalam memastikan kelancaran dan keselamatan pertandingan.

Selain hadiah utama, penganjur turut menawarkan hadiah wang tunai hingga tempat ke-50, manakala pemenang ke-51 hingga ke-70 menerima hadiah saguhati. Turut ditawarkan ialah dua buah televisyen LED 32 inci serta enam kekili Shimano dan hamper sebagai cabutan bertuah. Pertandingan bermula jam 8.00 pagi hingga 1.00 tengahari.

Pengurus Wakjali Event, Md Zali Kasran berkata pertandingan itu adalah

yang pertama selepas lebih 10 tahun pertandingan memancing tidak diadakan di Kolam UPM pada skala mega.

“Sebelum ini ada pertandingan yang diadakan di sini tetapi secara kecil-kecilan, khususnya ketika Pesta Konvo UPM.

“Satu waktu dulu, Kolam UPM adalah legenda bagi kaki pancing kerana di sinilah industri memancing mula berkembang selain memiliki pelbagai spesis ikan bersaiz mega.

“Antara spesis utama di sini termasuk patin, tongsan, jelawat, kap rumput, ikan raja (peacock bass), pacu, rohu, tilapia dan lain-lain. Malah spesis siakap air tawar dan tapah juga pernah mendiami Kolam UPM.

“Namun selepas lebih 10 tahun tiada pertandingan berskala mega di sini, tiada sesiapa tahu apakah spesis dominan ketika ini,” katanya.

Yuran penyertaan ialah RM100.00 untuk satu joran dan peserta bebas menggunakan satu joran atau lebih. Konsep pertandingan berdasarkan Sapu Bersih iaitu setiap peserta layak menang lebih daripada satu hadiah.

Bagi mengenalpasti spesis ikan di

Kolam UPM, pihak penganjur dengan kebenaran daripada Taman Pertanian Universiti (TPU), telah melakukan ‘test’ memancing baru-baru ini.


Hasil yang diperolehi daripada ‘test’ memancing selama tiga jam oleh lapan pemancing ialah 34 ekor ikan rohu, pacu,

lampam, tilapia dan keli (seekor).

Kaunter pendaftaran akan dibuka di lokasi pertandingan bermula jam 12.00 tengahari Sabtu ini. Sebarang pertanyaan mengenai acara ini boleh berhubung dengan penganjur di talian 012-4212092, 013-3838655 dan 013-3113911.



Ikan rohu yang didaratkan peserta ‘test’ di Kolam UPM.



Ikan pacu yang berjaya dipancing ketika ‘test’ di Kolam UPM.